

MUSINSIMI WANSONINSONI



Lino akube kuti Mwami ayungizye zileleko Zyakwe ku ciiyo cakuti *Musinsimi Wansoninsoni*.

² Cifumo cino twa bwezedwe maningi a musinsimi oyo wakasamide cikobela cakubolekwa. Elyo tu lizi sunumasiku, kuzwa mu Lugwalo, cifumo cino, kuti swebo lwesu tula sama cikobela cakubolekwa. Tu...cikobela. Alimwi Ndili kkomene kapati kuti ncikobela cakubolekwa, nkambo ka cikobela eci nco tusama eno calanganisigwa kuli Leza mbuli bululami, kwiinda muli Kristo Jesu. Alimwi ta tusami cikobela cakaligwa mapempya amwi alwiiyo lwabukombi eco cakaligwa mapempya azyuuka mbuli mpaso, a bumwi bumbi, zyaamba kuti, “I mazuba aa maleele akainda, alimwi kwiina cintu cili boobo mbuli i—i kubakonse kwa Muuya Uusalala lino.” Pele tu samide cikobela ca bululami Bwakwe.

³ [Kabeela katakwecintu aa teepu—Mul.] Kutali mu kukonzya kwesu kwini, pele mu i—i kukonzya kwa Mwami wesu Jesu.

⁴ Alimwi cindi Nda kuselemukila ku Jordano, Ndi yanda kuti nkenosamide cikobela Cakwe, kusyoma muli Cakwe. A cimvule cipati ca mulyango eco cikkede kumbele lyesu toonse, citegwa “lufu,” ciindi coonse moyo wesu waduntaana, tuunka duntaana komwe muni loko ku mwaakwe oyo mupati mwaalumi a mwanakazi oonse ngo beelede kuya kwiindamo. Mpawo cindi Nda kuboola ku mwaakwe oyo, antoomwe a ndinywe nobasyomi, Ndili kkomene loko kuziba kuti Nse unki okuya a ceeci mu moyo a mizeezo wangu, kuti Nda kacita cintucimwi cipati. Ndi inka kokuya, nke lyaambilila a kuziba kuti Ndime sizibi, a kuziba eci, kuti, Ndi yanda kuli vungaila mu zikobela zya bululami Bwakwe; a bumboni obu, bwakuti, “Ndili Mu zyi mu nguzu zya bubuke Bwakwe.” Kuti, cindi Akwiita kuzwa ku bafu, Ndi yanda kuya kuyutuka.

⁵ Lino, cilao cesu a dilama zili bambilidwe ku cibalo cesu sunumasiku, ku buzuba bumbi muli Israyeli, eyo yakali kutandila myaka ili myaanda misyoonto yakainda i—i ciindi ca Eliya. Bubotu abuyumuyumu bwakali sikide mu bulelo bwa Israyeli. Elyo lino tuli aa cilao sunumasiku. . .

⁶ Cifumo cino twali aa cilao awo akali kulikozyanisya kunji kwakunyama, obo cikolo ca basinsimi mbo cakabede kutala kuya kacyiisya kuba basinsimi. A boobo mbo bakali babombe, kusikila abalo teeba kakonzya ku zimvwisya nguzu zya Leza. Ba kayeeya kuti nguzu zyaka sumpula Eliya a ku muwaalila kubusena bumwi bwa mulundu, nkabela bakatuma nkamu yakulingula kuya kumuyandaula. Kakuli Elisha wakalizi, kabotu akweelela, kuti Leza waka mutolede ku Bulemu.

Nkambo, ta kaliko. Leza wakali mutolede, nkabela wa kaloboka lufu kwiinda ku kuya ku Muunzi kuli Leza, aa nkalaki ya Mulilo a mbizi zya Mulilo. Elyo mpawo twa kabona kuti maseminari abo a milimo yabo ya lwiiyo lwabo lwabukombi tii yakabeleka. Ca katola kusala a kwiita kwa Leza kubamba musinsimi wa Leza.

⁷ Alimwi lino, sunumasiku, tu jana Israyeli kaili mu ciimo ciwide. Israyeli yaka jisi bubotu abubi bwayo. Yakali cikozyanyo nciconya ca mbungano ya sunu. Ciindi cimwi bakali aatala lya ng'anda, ciindi cakatobela bakali kunselelo mu kkuti. Eco nce citola kutubamba kulumba cintu cibotu. Ngooyo ngo baita kuti mulao wa lwiindano.

⁸ I muntu uusiya waku Africa taakwe nakazi kuti wakali kusiya, ku lukanda lwakwe, cita kusikila na kabona David Livingston. Elyo wa kati... Mpawo wa kaziba kuti lukanda lwakwe lwakali kusiya, nkaambo lwa Liviingston lwakali kutuba. Lwalo ndwiindano.

⁹ Inga toziba nzila ya kulumba isikati ikuti na toka jisi busiku. Inga toziba nzila ya kulumba kumweka kwazuba ikuti na toka jisi isika lwa makumbi manji. Inga toziba nzila ya kulumba bululami, citakuti waka jisi busendami bumwi ciindi cimwi. Inga toziba nzila ya kulumba nseba mbotu, citakuti waka jisi nseba mbi ciindi cimwi. Nzeezyo buyo...

¹⁰ Ako nke kaambo Ndi yeeya kuti tuyo lilumba Julu maningi, nkaambo twa kapona aa nyika ciindi cimwi. Elyo Ndi yeeya kuti mulao wa lwiindano... I kaambo nco tulumba Muuya Uusalala kapati, sunumasiku, nkaambo kakuti twa kapona ciindi cilamfu loko mu mbungano eyo yaka twaambila kuti kwakanyina cintu cili boobo. I kaambo nco tu ulumba, sunumasiku, nkaambo twa jisi lubazu lumbi. Eyi nje nzila Leza nja kacikanzila kuba, nkaambo bantu Bakwe bakali bujisi bubotu abubi bwabo. To kazibi nzila ya kulumba mpela ya mulundu, citakuti wakali mu kkuti cindi cimwi. Alimwi, aboobo, to kazibi nzila ya kulumba maanzi mabotu, citakuti wakanywa maanzi amwi mabi ciindicimwi. Elyo mpawo nywebo—nywebo... Lweendo loonse do, walo mulao wa lwiindano.

¹¹ Lino, Israyeli yakali muli cimwi ca ziimo zya kuwa, nkabela ino ncintu ncoba kacita!

¹² Lino, ba Israyeli bakali bantu basale, bakasalwa, bakakketedwe, cakuti Leza wakasalide ba Israyeli ku bukanze bomwe bugaminina, kuti bulowa bwaba Israyeli bwa keelede kuba kukunka kwa bulowa busalala maningi, nkambo kuzwa ku mizukulu eyo kwakali kuyo boola Mesiya Mwini.

¹³ Muciindi coonse kwiinda mu Cizuminano Cakale, Leza wakalibonya mu muntu. Leza wakalibonya muli Abrahamu, mbuli musyomi wa lusyomo. Leza wakalibonya muli Davida, mbuli mwaami. Wa kalibonya muli Josefa, mbuli bululami. Wa kalibonya muli Musa, mbuli musinsimi, mupaizi, sikupe

milao. Wa kalibonya mucindi ca makkalo, mu musinsimi. Wa kalizibya Mwini lyonse mu bantu, mu cibeela, kwiinda ku musinsimi, mwaami, mupaizi, sikupa milao, a bumwi bumbi. Pele, muli Kristo, Wa kakkala muli Nguwe, mu buzule bwa Buleza camubili, a kuziba kuti oyu Muuya kumalekelo weelede kuya kujana busena bwa kulyookezya. Ali Eliya, wa kali muntu wa Leza ku lubeta. Wa koongolweda lubeta lwa Leza. Elyo, Musa, wa kali sikupa milao, kuti weendelane a mbaakani nape kuzwa. Mu zintu ezi zyoonse, Leza wakaimininwa. Pele cindi Na kasika kuli Kristo, Wa kali londokede, buzule boonse bwa Buleza camubili bwakakkede muli Kristo.

¹⁴ Alimwi Leza wakali tondezya Mwini lomwe mu buzule, ciindi kacitanaba. Mu Bbuku lya Matalikilo, mu bweende bwa Melikisedeki, “Oyo wata kajisi wisi, naanka banyina; naanka matalikilo aa mazuba, na magolelo aa myaka, na magolelo aa buumi.” Alimwi Wa kali Mupaizi, Mwaami wa Salemu, mupaizi wa Leza, wa Leza Sijulu lya Majulu, Oyo wata kajisi matalikilo na magolelo. Ta kali umbi kunze lya cikozyanyo ca Mwami Jesu Kristo. Nkaambo, Wa kali Mwaami wa Salemu, uuli Mwaami wa Luumuno, uuli Mwaami wa Jerusalemu. Alimwi Wa kali mu cikozyanyo cakacili kuza. Naba sikale Abrahamu waka Mu pa kwakkumi. Wa kali cikozyanyo ica kuboola kwa Mwami Jesu. I Melikisedeki nguwenya waka swaana Abrahamu ku nkwaalale kakutanaba lunyonyooko lwa Sodoma a Gomora. Alimwi—alimwi Wa kamuswaana kumane Sodoma a Gomora, cindi Abrahamu naka Mu pa zimanyakkumi zya zisaalo zyoonse nzya kabweza kuzwa ku mwaami.

¹⁵ Zintu ezi zyoonse zyakatondezegwa mu zimvule, zyakali kutondezya Kristo. Elyo lino, zimvule zyoonse zya basalali ba Cizuminano Cakale, baka jisi bubotu abuyumuyumu bwabo, zyakali zimvule a zikozyanyo, a mikozyanyo kuli ndiswe sunu.

¹⁶ Lino, tu jana kuti Israyeli tiyiya keelede kusanganya mu lukwatano. Lukwatano lwabo lwa keelede kuba akati kabo kuli umwi aumwi, kutali mu Israyeli kusola kukwata Munamasi, pele bakeelede kubamba kukunka kwa bulowa bwabo. Alimwi akwalo kusikila buzuba obuno, Ndi syoma kuti kukunka kwa bulowa bwaba Juda kwalo nkukunka kwa bulowa—bulowa kusalala atalaa nyika sunu, mba Juda. Ba cilangila oyo Mesiya. Pele, Wa . . . Tu lizi kuti Wa kasika kale; a meso abo akoofwaazigwa, kutegwa katuba a coolwe ca kweempwa kwiinda muli Kristo.

¹⁷ Lino, kuciindi ca bulelo bwa Ezra, bana ba Israyeli bakali wide. Ba kaunkide kuyo bweza banakazi bana Moabu, alimwi bakabweza banakazi bana Amori, aba Periziti, abanji ba masi ambi. Mpawo tiiba bakabakwata biyo, pele bakali kucita bwaamu akati kabo, busofwaazi, a kusofwaazya nkukonya kukunka kwa bulowa, kuli nkukunka kwa buumi.

¹⁸ Elyo ino ncifwanikiso sunu ca mabungano esu, nzila mbobali mukuwa kuzwa ku bweende bwakuziyula kwacyianza cakale eco Leza nca kabambila mbungano. I milazyo njo twa keelede kuponena ayo, mbungano ili mukucita bwaamu a inyika. Ya njila mu inyika, akutalika kuzyokota zyokota mu nyika.

¹⁹ Lino, eci cakaubausya musinsimi maningi, mane, cindi na kasika kumbele lya Leza, wakabaa nsoninsoni ku busyu bwakwe. I citaanzi cindi na kamvwa kujatikizya ncico, alimwi wa kabona i—i kubija kwa micito ya bantu bakwe, caka mucisa loko kusikila wa kakkala ansi a kulinanika mwini, kajwa masusu akwe a cilezu cakwe, alimwi wakalila mu moyo wakwe kumbele lya Mwami, mu mupailo. Mpawo cindi cituuzyo caku mangolezya ni cakatuulwa, wa kanjila mu tempele a kuwida ku mazwi akwe a kubaa nsoninsoni kumbele lya Leza, nkambo ka zibi zya bantu.

²⁰ Lino, takabaa nsoninsoni ku kagwagwa kasalalapyu ika cooko ca malaiti asubila. Ta kabaa nsoninsoni ku banywi bamakeza mu dindi lya gehena, nekubakuti ncibyaabi mbuli mbo cikonzya kuba. Pele, wakabaa nsoninsoni nkaambo ka cibi ca basale.

²¹ Mpawo cintu nco tu yandikana sunu mbasinsimi bamwi banji bajisi Leza uukubwene mu myoyo yabo yakubaa nsoninsoni mu Busyu bwa Leza, nkambo ka zibi zya bantu abo baliita lwabo kuti mbantu ba Leza a kucita nzila njoba cita. Ino mause ngo twa kaleta ku busena obu! I kulilemeka kwa bantu besu. . .

²² Eci tacili ciiyo citete ku kanana. Nda konzya kuyeeya zintu zinji zyakali ziteteete loko ku kanana. Pele, mukwesu, ikuti na muntuumwi taimikili mu buzuba obu, bubi bwa bumambi mbo tuponamo, a kwiita mibala, ncinzi ciyo citika? Muntuumwi weelede ku cikanana cintu. Muntuumwi weelede kucibikka kumbele lya bantu.

Antela Ezra takali kuyanda kucicita, pele cakali mu moyo wakwe.

²³ Alimwi cindi wabona mulanda wa Leza kasinizizye kapati kusikila waba busyu bwakwe a maanza akwe mu luwo, kukomba kuli Leza, akubaa nsoninsoni nkaambo ka milandu ya bantu, mpawo uyo bona lubukulussyo kalutalika. Ii muntu takonzyi kulala mu Busyu bwa Leza, mbungano taikonzyi kukkala mu Busyu bwa Leza, kungsi lya kweempwa, citakuti Muuya Uusalala waseluka a kupa kunanikwa a nguzu kutalika mulimo wa Leza omuya akati ka bantu abo. Ceelede buyo kuba!

²⁴ Nditondezye mwaalumi. Nditondezye umbi Calvin, Knox, Finney, Sankey, na kufumbwa wa baabo ulimvwa mukuli wa bantu, uya kulala ku busyu bwakwe a kulila a kukomba kumbele lya Leza. Ko tutumina John Smith wa mbungano ya Baptisti alimwi, oyo waka komba busiku boonse nkambo

ka milandu ya bantu, kusikila meso akwe akajala nkambo kakuzimba cifumo citobela, kuzwa kukulila, mane mukaintu wakwe wakali kunga wamusololela ku tafule a kumusanina kalimbabula kakwe kuzwa kuli conco. Nditondezye John Wesley alubo, muntu wakali kusuka kupya wakayokololwa kuzwa ku mulilo, Njo kutondezya lubukulusyo.

²⁵ Eco ncobali mukucita sunu, tuli muku cuumauma kusule. Tu liita *boobu* a *boobo*, a lubukulusyo, kakuli kwiina lubukulusyo kuli ncico. Mbo mbubo. Kuli kukopana kwa kulimvwa ikwa bukombi aakati ka bantu, pele kakutakwe lubukulusyo.

²⁶ Ba kajisi nkamu ya bukombi mu buzuba obo. Ba kajisi kukopwa mu buzuba obo, pele ba kali kuyandikana lubukulusyo.

²⁷ Baa, mukwesu a mucizi wangu uyandwa, kulilemeka kwa cisi eci kwaubauka loko mane inga kwacitya mubwa kuusansoni. Inga kwa citya babwa kufwa nsoninsoni ikuti na inga wacita boobo, kulilemeka kwa bantu besu! I bantu, noiba myaka yakainda, zintu nzo tujisi, i—i cisi cacita, zintu ezyo bantu nzoba kacita! Nkaambo ka kubula mipailo.

²⁸ I mbungano yakali kucita, yataali kusyoma mu zipekupeku, teebe kali kubazumizya bana babo kuya ku zipekupeku. Ba kali kuzitantamuka zipekupeku. Elyo, sunu, baa akwalo bali jisi. . . Ba kajisi zipekupeku mu maanda abo beni. Aimwi ng'anda ili jisi televizhioni.

²⁹ Mu busena awo mo bakali kuyeeya kuti kwakali kutondwa kunywida makoko, mu busena awo mpo bakali kuyeeya. . . John Barleycorn, ino wakali mulombwana mulemu wakali sikunyema buyo. Sunu, peseenti ili makumi ali cisambomwe ya bategwa Banakristo balanywa makoko muziindi buyo zisalesale nokuceya mu mwaka. Mpawo balaindizya kapati, kucindi ca Krisimasi, cindi noba jisi kusekelela kwabo. Nkaambo, bakasala lwiio kutola busena bwa lufutuko. Ta luka ciciti.

³⁰ Neo tu yandikana ndubukulusyo. Tu sama makkoni pulasita, mpawo kwaagusya; kkoni pulasita imbi, mpawo kwiigusya, mpoonya kujana kuti kucisa nko kucili. Cintu neo tuyandikana sunu takuli kuzyalululwa kwabuleya, tabuli bukanazi bwabupampu. Cintu neo tu yandikana sunu nkulonzegwa kwa Bulowa, kwakatumwa aa Leza, kwa ciyanza cakaindi kuzwaku Julu. Makkoni pulasita taa kagwasyi pe. Tu ciswa kubula bulowa. Tu yandikana kubikkwa Bulowa. Tu yandikana kujokela ku Makanimabotu aacyianza cakaindi ayo aitila kweempwa kumbele lya Leza. Alimwi kutali kulyambilila kwa kusukana maanza, akwa meso aatakwe misozi; pele lubukulusyo lwakatumwa aa Leza, lwa Muuya Uusalala a lukono lwa kusalazya kwa Bulowa bwa Mwami Jesu Kristo mu moyo aumwi wamuntu. Tu yandikana lubukulusyo lwa kutalika

mu Mbungano, a kufumpa cisi coonse. Tuyo fwa, tuyo loba, twa nyonyooka, kakutakwe oyo musyobo wa lubukulusyo.

³¹ Nda cimwa a kukatala kubona lubukulusyo luniini loko lwa Hollywood, olo lwiitwa obo, oko bantu nkoba njila a kukopwa cakunyanyamukwa kwa maoora masyoonto, alimwi, na buzuba na obilo, na mvwiki na zyobilo, a kuzwa nkabela nku koonse kuli ncico. Mukwesu, inga waba mu...nyanyamukwa kwinda ku lubukulusyo. Inga waba a kulimvwa. Inga waba a makanze mabotu. Zintu ezyo zyoonse zili kabotu, pele ta tuyandiki ceeco sunu.

³² Tu yandikana lubbizyo lwa Muuya Uusalala, lwa kucinca kulimvwa, a bupampu, a kubonekela, i zilengwa, buumi bwa bantu, a kubajosya mu lweendo luli kabotu alubo. Kunze lya kubikkwa kwa Bulowa buzwa ku Kalivari, lubambululo lwesu loonse talu kagwasyi pe nokuceya.

³³ Ta tuyandiki UN, tulii jisi UN okuya, elyo ncinzi ncoba kacita? Zina lya Leza talyaambwi. Bala yoowa ku Li ita. Kwaka buzigwa ciindi cimwi, kwiinda ku nkamu ya bapaizi kuti, “Nkaambonzi ncoba tapa mupailo?”

Ba kati, “Inga kwalebya muntuumwi umbi, umwi wa bamwi abo bata kasyoma muli Leza.”

³⁴ Oh, nco tu yandikana ndubukulusyo. Tacibambi lwandaano lumwi oyo ngo ulebya, twe elede kwaa kambauka Makanimabotu a kwiita bube bwesu bwini kubeleka. Nconzyo. Inga tiinda kupa kakkobili ku mabambe ali onse ayo asiya Leza muli ngawo, naa ngu UN, na Bapati Bone, kufumbwa mbo cinga caba.

³⁵ Kusikila cisi eci cisinsimukile ku busena, kuti tuli mukufwa kakutakwe Bulowa bwa Mwami Jesu Kristo; kusikila bagame basinsimuke ku i—i kaambo, kuti tuli mukufwa! I kaambo nco tuli mukufwa, nkubula citaanzi cini, nzila, busilike, cisilisyo eco Leza nca katupa ku Kalivari.

³⁶ Ta cigambyi kuti cicitya muntu kubaa nsoninsoni! Ta cigambyi! Ii mukambausi, wini nconzyo ulanga aa mbunga yakwe a kusola kubasololela kumbele lya Cuuno cabwami ica Leza. A kuswaya miinzi yabo, a kubajana kufweba misanga yatombwe, kabaamba kudana kubbi kuli umwi aumwi, kusangabalisa kusule lya lubuwa, a mapobwe aamakokoko; kabeendenda mu tugwagwa, banakazi babo bakubusyi, a ba myaka yakukomena yaakati, a bamwi bambi, alimwi nobaba banene kabasamide cibbudula ciniini. Mutumbu kali mu kagwagwa kajisi muvwanda mu kuboko kumwi, kasamide cabwaamu loko ku kukwelelezya kumvwa kwa sikusambala makoko kunzaacuulu umwi wakeendenda mu kagwagwa; a kaliita kuti Munakristo. Inga cabamba muntu wini wa Leza kubaa nsoninsoni, kuleta muntu uli boobo mu Busyu bwa Leza. Nconzyo!

³⁷ Alimwi koonse kusangana kwesu mu mbungano a kujana musela mubotu loko, kwaboola ku bufubafuba, alimwi kwaka cita mu buzuba obo alimwi kuyo cita muli boobu. Ko tujosya kuli Leza, kutali a kunjizigwa kwa lwiiyo, kutali a kunjizigwa kwa lubambululo lwa bukombi, kutali mu kunjizigwa kwa musyobo umwi wa lwiiyo lwabukombi lwakabambwa aabantu. Pele lubbizyo lwa Muuya Uusalala lwa ciyanza cakaindi lwakatumwa aansi kuzwa kuli Leza, kuzwa ku Julu, mu luzibo lwa pentekoste lwa kuumpa kugwisya businyama. Mpawo kusintanya omuya angale eyo Leza nja kakanzila kuba omuya, ya mwana wa Leza mulombe a musimbi. Mane tucite ceeco, bakwesu a bacizi, tu cino jisi masusu aageledwe, misila, aa banakazi balibonya kuba basibwaamu; a baalumi kabanywa, kufweba, a kuliita kuti Mbanakristo; nkaambo tabazi cibotu maningi. Mu myoyo yabo, oyo nguonya muyanda wa businyama uuli alya, alimwi tu yandikana kusalazya mbungano, kuzwa ku kaanda kaansi kuyaku cikambaukilo. Amen. Lino mbo kuyandika.

³⁸ Cintu nco tuyandikana mbasinsimi bamwi bansoninsoni. Leza...Ciindicimwi bantu bala boola mu mundando wa mipailo, kuzo kombelwa, kuboneka kuti baunka ku ng'anda ya mpuwo mbi. Mbo mbubo. Kuboola kulomba cintucimwi kuli Leza, a kuboneka mbuli Jezebele. Cintu nco tu yandikana sunu nkusalazya maanda a kukasaazya myoyo, kwa basinsimi ba Leza abo bayo imikila mu cikambaukilo a kwiita cintu awo, a kwaamba ceeco ciluleme a cilubide; a kukambauka Makanimabotu kakutakwe kulimvwanya, kusikila basizibi bawida aa cibuye, a koomoka mane Leza watuma Muuya Uusalala wakusalazya maumi abo. Amen. Tu lizi obo mbo mbubo. Mbo mbubo.

³⁹ Nda kakambauka kuno kutali ciindi cilamfu cainda a kwaamba kuti mwanakazi oonse mu dolopo eli waka jisi mulandu, mu nzila imwi na imbi, ya mamambi. Mbo babede. I banakazi balaunka ku musika mupati kuya nkabela taba konzyi kuula madressi, citakuti ali mbuli kuti nkutilwa muli ngawo. Nseli waano ku...Eyi ni mbungano yangu ini. Ndi jisi nguzu zya kukambauka eco Muuya Uusalala nco undaambila kucita. Nconzyo.

⁴⁰ Andi kwaambile. Nseli mujani butongo kuli nduwe, omucizi wangu. Pele sa Muuya Uusalala tiiwa kakuyiisya bwandeene? Ikuti na ta ciciti, Nda yoowa kuti toka utambula Muuya Uusalala. Mbo mbubo. I Muuya Uusalala takuli "koongolola." I Muuya Uusalala takuli "kuzyana mu Muuya." I Muuya Uusalala takuli "kukanana mu myaambo." I Muuya Uusalala mbululami. Leza, kotupa lubukulussyo lwa Muuya Uusalala ilwa bululami lwakatumwa aa Leza.

⁴¹ Sena tomvwiysi kuti cindi wali samika boobo a kweenda kuselemuka kagwagwa, elyo bamaalumi kaba kulanga munzila ilubide, kuti ku Lubeta, inga kono njoloma mbuli mpana

kumbele lya mulumi wako, pele ku Lubeta uyooba a mulandu wakucita bumambi a mulombwana oyo ngo kalitondezya lwako?

⁴² Ta cigambyi kuti ciya kucitya muntu kubaa nsoninsoni! Ta cigambyi! Ino cicita nzi kuli Leza? Kakuli, Bbaibbele lyakati, ku matalikilo, kuti, “Ca ka Mu bijila, kuti Wa kalenga muntu.” Ca kabijila moyo wa Leza, cindi Na kabalanga mu mazuba kakutanaba lunyonyooko lwa zambangulwe, kuti Wa kasola kulenga muntu. Ncinzi cakacitika? “I bana ba Leza bakabona bana basimbi ba bantu kuti bakali babotu.” Lwakali lupilingano. Lwakali lulalano lwankwela lubyaabi. Cakali cintu eco caka tanda bana ba Leza kuzwa mu muunda wa Edeni. Cakali cintu eco caka keenzya lubeta lwa Leza, kuleta luumuno aa nyika. Cakali nce cintu eco caka banyonyoona. Kwakali kusangana oko nkukonya, aakati ka banakazi a bamaalumi, abo baka citya Sodoma a Gomora kubbila kungsi lya Lwizi Lufwide.

⁴³ Kwa kaambwa a basinsimi. Kwa kaambwa a Mwami Jesu, kuti, “Mbuli mbo kwakabede mu mazuba ayo, mbubonya mbo kuyoooba kakutanaba Kuboola kwa Mwana wa Leza.” Tula langa sunu, a kubona kuti mbungano ili mukubweza bupange bwayo, kutali buzwa mu Bbaibbele, buzwa kuli Rute a buzwa kuli Naomi, a bunze lya Sarah a bamwi bamu Bbaibbele, pele bali mukulikozyanya, nobaba banakazi bamu mbungano, kuba mbuli Hollywood ankukonya kukwelenkanya kwa dyabulosi.

⁴⁴ Alimwi obo bantu besu, abo baliita kuti Mbanakristo, kuunka awa a kujana nzila ezi zya bantu mubi. Aya marekkodi ya Elvis Presley, kufumbwa zina lyakwe mbolibede, umwi wa bantu banjidwe dyabulosi aba keenwa loko Ngwe kasola kumvwa mu buumi bwangu. Arthur Godfrey mbuli oyo, a kuswiilila ku musyobo oyo wa bufubafuba buli ku maredio anu; a kukaka kumvwa nkambauko ya Makanimabotu kai kambaukwa mu Bbaibbele. Leza amu fwide luse. Ino musyobo nzi wa muuya ngo tujisi akati kesu? Ni nconzyo.

⁴⁵ Ta cigambyi musinsimi wa Leza wakabaa nsoninsoni kumbele lya i—i Mwami. Wa kalizi kuti obo bwakali busendami. Elyo wa kaimikila a kukombezezezya kaambo, a kwaamba kuli Leza kuti, “Ta tululeme.”

⁴⁶ Ncobeni tuli boobo, nobeenzuma, kusikila twa konzya kujokela ku kasena ako ka kubikkwa Bulowa. Amuleke kusola kusama ma pulasita. Amuleke kusola kunana mafuta amwi. I kuponya taku konzyi kusika citakuti kukunka kwa bulowa kakuli kabotu.

⁴⁷ Ako nkekaambo bantu bajisi dayabbetisi. Ikuti na umwi wasola kulitenda mwini, antela ta kaponi. Nkaambonzi? Nkaambo maseelo eni asubila alikagwa.

⁴⁸ Alimwi mbungano mboizulwa yaba iciswa dayabbetisi. Alimwi cicisa ciniini casika, mubusena bwa kuzumanana kwenda, ula kubweza. Ta cikonzayi kupona. Kuliyanda, buunyu,

bwaamu, zyoonse zimbi zili mu kkalenda ya Leza “nku lubizya,” mbungano ili mukubweza zilengwa ezyo. Bamaalumi kabanywa, kufweba, kwaamba kudana kubbi. Banakazi kabagela masusu abo, akunana misila, kucita misyobo yoonse ya zintu, kulisamika cabwaamu ku kulanganya bantu. Zintu ezyo zyoonse nkozili nkambo ka nkubula Bulowa bwa Mwami Jesu Kristo bwaku tusalazya kuzwa ku busendami boonse. Amen. Eco inga calibonya kuyuma. Masimpe, nciyumu, pele bwalo Mbwin.

⁴⁹ Ikuti na ta tubbyi imbeta zya Leza Singuzuzyonse, muyo jatwa muli bumwi bwa mazuba aya mu kubbotoka kwa atomiki okuno, kuyo tuma buntu boonse bu Butamani, kuyo swaana Leza oyo uyo tambula biyo Bulowa bwa Mwana Wakwe, Kristo Jesu. Kukulwaizya kwangu: nkuti boola kungsi lya Bulowa, kukulwaizya kwangu kuli nduwe nkuti lulama a Leza, kukulwaizya kwangu kuli nduwe.

⁵⁰ Ee, nkaambonzi ncotu takonzyi kuba a lusyomo? Nkaambonzi ncotu takonzyi kuba a kuponesegwa kupati kwiinda nko tujisi? Nkaambonzi ta tukonzyi kuliya kabotu? Nkambo kakuti tusamide makkoni pulasita; nkaambo tuzambaide mabbandegi; kubikka silutepu. Tu sola kuvumba cintu, mubusena bwa kwaamba kuti tu yandikana kubikkwa. Ta tukwe Bulowa. Ta tukwe Kristo. Mutali cengi nobeni.

⁵¹ Muta lekeli dyabulosi ku kuumauma aa kkuko, akuti, “Ee, Ndila unka ku cikombelo.”

⁵² I dyabulosi ulacita, awalo. Mbo mbubo. Wa kacita ncobeni; kaboola kuli Leza, kaunka ku cikombelo kutala ku Julu; kaboola kumbele lya Cuuno cabwami ica Leza, a bana ba Leza, kakkede a mbabo; kajisi kuswaangana a Leza. Wa kati, “Wali kuli?”

⁵³ Kati, “Kweenda koonse akoonse, atala aans, aa nyika.” Nko nkuko kwakabede.

⁵⁴ Aboobo, dyabulosi ulaunka ku cikombelo. I dyabulosi uzulilwa ku cikombelo. I dyabulosi ulilemeka mbuli Munakristo. Walo mucengi. Ikuti na ta kali kulilemeka mbuli Munakristo a kulilemeka mbuli sicikombelo, na takaba mucengi; taakwe muntu wakalino konzya kucengwa. Cintu biyo, cili andeene mbuli kusiya a kutuba. Ci liimpene kuli cimwi acimwi. Pele Wa... I Bbaibbele lyakati, “Kuyo kozyanya loko cakuti kuyo cenga mbabonya Basale ikuti kula konzeka,” oyo muuya mu buzuba bwamamanino. Beenzuma, tuli kokuya.

⁵⁵ Nciindi ca basinsimi ba Leza, oh, mukwesu, ca bakambausi, ikuti na inga mwa caamba, kulanduka cisi, ku kuwida ku busyu bwabo.

⁵⁶ Baa, nekubakuti, kuli mabungano aa Baptisti ali mamilioni ali kkumi afuka, ba Baptisti bali mamilioni ali kkumi afuka, mubwini, mu America, ba Methodist bali mamilioni ali kkumi aotatwe, ba Lutherani bali mamilioni ali kkumi aumwi, ba Presbyteria bali mamilioni ali kkumi. Luse, amu

ciyeeye eco! Alimwi cakuzumanana ku musobano wa bbola, ku kulibotezya, alimwi masiku Bwatatu, alimwi ziindizimwi Munsondo masiku, kukkala ku ng'anda kuswiilila televizhioni a redio, akuumana kusyoonto kwakaindi akudana nkoba janan kuzwa ku Hollywood. Buntu bwako bula kunkulikila aa musyobo oyo wa zintu.

⁵⁷ Kakuli, weelede kuti kojisi Bbaibbele lyako kubusena bumwi, kakkede kunembo lya Leza, ku mazwi ako, ii kukombela zibi zya cisi.

⁵⁸ Kwalo Ndi jisi mulandu antomwe andinywe. Nda bamba muzeezo wangu. Ku lugwasyo a luzyalo lwa Leza, ikuti na Leza wesu uyo ndipa nguzu zya kucicita, Ndili kanzide kubindaanina ku mbaakani ya lwiito lwaatala muli Kristo Jesu, mane lufu luka ndaangulule. Leza abe mugwasyi wangu kucita boobo! "Kondi gwasya," ngo mupailo wangu. Mukubona milimo, a mukubona zintu ezyo Nze kabona a nzomwa kabona, azi syalilide, akuba kuciswa kubula bulowa bweelela.

⁵⁹ A cikombelo eci eco cilizidwe moonse mu inyika mbiizulwa, obu busena buniini bwa samende bukkede mu kkona, Leza waka kusumpula kumbele lya cisi. Nconzyo.

⁶⁰ Nda yeeya eco Davida, busiku bumwi, cindi na kati, "Mpaawa Mpendi, nkepona mu ng'anda ya kedara, nkabela bbokesi lya Leza wangu likkala mu tente." Wa kati, "Njo Mu yakila ng'anda."

⁶¹ Natani, musinsimi, wakati, "Kocita koonse kuli mu moyo wako, nkaambo Leza ulaa nduwe."

⁶² Busiku obo, Leza wakalibonya kuli Natani a kuti, "Da-... Koya kaambile Davida, 'Ino wakali ni, Davida? Wa kali... Nda kakugusya ku ciba cambelele, kuzwa kukweembela mbelele. Mpawo Nda kakumbila zina demu, mbuli bantu balemu bamu cisi.'"

⁶³ Nguni wakali mu cikombelo eci ciniini kakkede awa? Cintucimwi cakaindi ciniini, cakatandwa kacikkede ku kkona lya Eighth a Penn Street, kusikila Jeffersonville tiya kazi mpo cakabede a bantu bakali kusika kuno. Alimwi asunu, Leza, ku luse Lwakwe, waka mubweza a kmuucitya kuba bantu balemu. Bombay, India ilizi awo cikombelo eci mpo cikkkede. Durban yakali kuzi; amasi aya oonse ambi. Africa ilizi busena obu mpo bubede; India, Germany, England, Finland, Sweden, Europe, Asia, balo boonse, kulaale kumusanza mu tusuwa twa Thailand, a kumusanza omuya, balizi koonse kujatikizya ncico. Alimwi Leza waka tucitya kuba mukozyanyo ku bantu. Alimwi kuyeeya, mpawo, Leza nakamana kucita ceeco, mpawo twa vuuluka akuzyokota zyokota mu zintu zya inyika, akuba mbabonya baciswa kubula bulowa bweelela bwa kumuuya. Baa, twe elede kuba ngazi ya mumuni eyo iibikkidwe atala

lya cilundu, nkendulo eyo itakonzayi kusiwa. O Leza! Ndi jisi mulandu mbuli bamwi banu.

⁶⁴ Eco Nce pandulula, Ndi yanda—Ndi yanda kweempwa kwa ciyanza cakaindi, kwakatumba aa Leza, a kwiitwa kujoka kuli Leza, cakuti bamaalumi a banakazi bakweenda ku mulyango oyo, aa makkilacchi, baya kweenda kaata cinoliko. Cindi boofu bakusololelwa ku mulyango, bayozwa kaba kubona. Cindi basinkematwi bakuboola kabali basinkematwi, bayozwa kabamvwa. Cindi basizibi baakunjila, kabasiya kunombana zibi, baya kuzwa, kabasambide mu Bulowa bwa Kabelele. Sa inga tii twa cicita? Leza wakaita ba Israyeli a kubacitya kuba mukozyanyo. Leza waka twiita a kutucitya kuba mikozyanyo, pele twa ubausya Leza, nkabela kutufwisya nsoni kuba mu Busyu bwa Leza.

⁶⁵ Ku yeeya kuti, zintu ezyo Nzya katucitila! Obo Mbwa katu sumpula kuzwa ku ciba cambelele! Obo Mbwa ka tuzibya, ku inyika yoonse! Obo Mbwa ka tucitila cintu cipati! Elyo, nekubaboobo, tula zyokotazyokota, akusangana konse akuya kumasena, alimwi tuboneka kutasinizya. Ta tucipi limbi mipailo, a zintu taziciti buya, mbuli, kweenda kabotu. Elyo tu sola kubikha mabambe maniini, makkoni pulasita, kukucesya kucisa. To konzyi kucesya kucisa kusikila wajana, Bulowa bubotu buvubide omuya bwa kuponya cintu. Nconzyo!

⁶⁶ Wa kosola kkoni, uyo lijanina dayabbetisi, nkabela kuyo kosola kuulu kwako. Muta soli kutantamuna *ceeci*, a kweenguluka *ceeci*, a kutenda kkoni pulasita aali *ceeci*.

⁶⁷ Pele cintu cakucita nkusika cigaminina kumbele lya Leza, a kwaamba, “Leza, Ndime sikubula bulowa bweelele, alimwi Ndi yandikana Bulowa Bwako kundi salazya kuzwa ku zibi zyangu zyoonse.” Oyo ngo mupailo wangu, syoma mboubede awako.

⁶⁸ Yeeya zintu ezi, omweenzuma. Bumwi bwa mazuba aya; ciya kukkwana buyo kucitika kakutana kuca cifumo, mbuli mbo ceelede kucitika myaka ili makumi osanwe kuzwa sunu. Bbomba lyomwe lya rokketi, limwi bbomba lya makkolobboti na hidrogini likonzya. . . I cisi conse cili mukupakamana.

⁶⁹ Mwa kacibona mu mutende buzuba bumwi oko nkoba yandikana sayaaansi, Pentagon, kwiingula makani andeke zyezegwa bamuzwakule. Tii cakali cakuyeya buyo, tii cakali cintucimwi caka cezeezya, akali masimpe, bwakali bupampu. Ba kauluka mu ciimo ca nkondo, ba kali kukonzya kwiima, bakali kukonzya kutalika, ba kali kukonzya kwiima, ba kali kukonzya kuziba, bwa kali bupampu. Ba kali buzi. I bantu bakaseka, ba kati, “Ndeke zyeenzegwa bamuzwakule?” Baka kufubaazy.

⁷⁰ Pele mulizi eco Nce yeeya? Jesu wakati, Ka tana kusika, kuyooba zitondezyo ku julu atala. Sena mwakabona? Walo Katana talika, kanyonyoona Sodoma a Gomora nkaambo ka makani abo aankwela, Wa katuma Baangelo kumusanza

kuyo vwentauzya. Baangelo bakasika ku nyika mu myaka misyoonto yamamanino. Ba kabonwa akati ka bantu; Nda amba, bantu basyomeka bakasanzigwa ku Bulowa abo ba cizyi. Ba kaimikila nokuba alimwi bakakkopwa zifoto zyabo. Mbo mbubo. Zilenge Zyabangelo zyakaswaya, kujosya ijwi kuli Taata, cakuti cibi cakalundana mane nyenyezi tazicikonzyi kumweka. I mweezi. . . I inyika yoonse ilimu kudadalika mbuli muntu mukolwi keenda masiku. Nincobeni.

⁷¹ Cibi akati ka Banakristo, akati ka Basale! Ba kasambala bupati bwabo bwakuzyalwa, nkambo ka mpuwo. I mukutausi waka sintanya Makanimabotu ku parti ya kulibotezya. Wa sintanya Makanimabotu aakasanzigwa ku Bulowa bwa cianza cakaindi ku bupampu a bantu, ku kambauka bupampu, mubandi wa nsangano, akoondonganya Makanimabotu. Bunji bwabo bakaunka mu masena akubelekela, kabakambauka, a kubelesya Makanimabotu kukujanina mpindu zya bugame, kupanga mali. Bunji bwabo bajisi matala mapati a myootokala, a zintu ezyo nzoba takali nooba azyo, kujana mpindu zya bugame. Kutali boonse; Ndili lumbide kuti kucili basyaalizi.

⁷² Mu mazuba akwa Ezra, cindi Ezra naka talika koomoka, a kwiita a kutapatila cibi, mulizi eco cakacitika na? Boonse basale, abo bakali kusyoma Leza, bakamu bunganina.

⁷³ Eco neo tu yandikana sunu mbaalumi a banakazi. . . Bakambausi banu bala kambauka, mabungano anu, a kwiita cibi kuti “cibi,” a kucitapatila, bantu beni ba Leza inga bakubu nganina ncobeni koonse, a kukkala a nduwe. Mbo mbubo. Nciindi ca kwiita, a kwaamba kuti eco cili eco, kupambula ciluleme kuzwa kuli cilubide. Leza kocipa kuli ndiswe, kuti tukabe a camba caku cicita.

⁷⁴ Amuyeeye buyo eco cikonzya kucitika. Mbuli Mbwele kumwaambila, Nda syoma, kuseeni, na kumvwa umwi ka caamba, kuti aa. . . Umwi wa baabo balindizi ula langilila; Nda luba obo mbo mucitika lino, ku mabbomba, na ndeke ziciza. Kutali ciindi cilamfu cakainda, kwakali mabambe akaboola kwiinda kubusena bumwi, ayo nge bakaita mulongo mupati, a myaanda yotatwe ya majeeti alosya mabbomba aatomiki a mabbomba aa haidrojini kalengelela kungsi lyazyo.

⁷⁵ Kutali ciindi cilamfu cakainda, ku bbuwa pati lya ndeke mu Shreveport, umwi wa balombe wakasanduka okuya mu miswaangano yakali ya Mukwesu Jack. Wa kati, “Tuli jisi mabbomba aatomiki kaalengelela moonya mu ziyobwedo zyesu.”

Nda kati, “Sa toli. . .”

⁷⁶ “Mu i. . .” Nda amba, “Mu i—mu ndeke; nkabela twa kali kunga twaunka kutala a kucita ambabo ncobeni, mazuba oonse.”

Nda kati, “Sa to yoowede?”

⁷⁷ Kati, “Taba jisi tulesuzyo muli ngawo. Pele tuli mucindi cakupakamana loko, cakuti mu mwaakwe wa miniti, tuvwalu tuli makumi ali cisambomwe, inga twaba a tulesuzyo omuya a kuunka. Alimwi zyaka bikkwa kale mungwimba akulibambila, zila konzya kuulukila ku England a mbabo, cakufwambaana.”

⁷⁸ Ziyobwedo zipati zili bambidwe mu maziba mapati, kuli konse. Alimwi baambila Russia kuti, “Ula acamba cakulosya bbomba lyomwe! Kulosya buyo bbomba lyomwe lya atomiki aa UN, na kubusena bumwi okuya, a kulanga eco cicitika!”

⁷⁹ Ciyooaba buti? Kunooli kujaya kupati kuya ku Russia. Alimwi ikuti na bacita ceeco, a kutalika kulosya mabbomba ayo aa atomiki a haidrojini, inga kwacitya kucitika kuccililana kunga kwaumpa nyika kuba—kuba katambo kanyonka, mu kunyebuluka buyo. Nywebo mulizi, inga tii cazuminana a Lugwalo nokuceya. “Nkambo nyika iyo pya, a julu, alyalo.” I maatomu aa nyika ayo yaka.

⁸⁰ Tu pona mu buzuba bwa ntenda. Tu pona mu buzuba cindi bantu ba inyika noba yoowa kufwa. I bantu bapati, bala—bala yoowa kuti kuti uyo bbotola bbomba eelyo litaanzi. I bbomba taanzi eelyo lisomoka, mpawo cintu coonse cinjila mu ii—ii mulundano.

⁸¹ Ceelede kuba ciindi cakukkomana loko mu inyika ku Munakristo. Ziindi ziyo cinca. I cakale ciyooaba bukulusigwa. Oh, ma! Lufu luyo cija. Kuciswa takubi limbi. Takucikwe miswaangano ya mipailo ku baciswa. Takucikwe miswaangano ya mipailo ku basweekede. Pele Leza uyo boola a kubweza Basale kuzwa ku myuwo yone ya nyika, nkabela bayo babungana kungsi lya mababa Aakwe mwini, alimwi tuyo pona a kulela a Nguwe kwalyoonse mu Julu Lyakwe.

⁸² Oh, mukwesu, mucizi, mweenzuma wangu, ikuti na toli bambilide sunumasiku, akube kuti ulibambile ku oora eli. Nda kutamba kuboola kuli Kristo Jesu, sunumasiku, nkabela kutambule. Yebo nokali wiindene, yebo nozi kuti takwe mpo eeledede kuba a Leza, Nda kutamba ku cipaililo kuba andime. Nda tamba umwi aumwi wanu kuboola okuno, a kutali biyo kwaamba, pele kukkala awa kusikila Leza wabusalazya buntu bwako kuzwa ku zintuzyonse ezyo zita Mu botezyi, kusikila wakonzya kuzwa awa koli muntu mupya. Kutali a kkoni pulasita, pele kuzwa awa a kubikkwa kwa Bulowa oko kusalazya bulowa bwako a kukupa Buumi bupya a bulangizi bupya. Kuzwa a lubbizyo lwa Muuya Uusalala. Kuzwa, kutali koongolola, kutali kuzyana, kutali kunji loko. . . Zyalo zintu zili kabotu. Zyoonse zizulilwa mu Mbungano. Boonse zizulilwa mu Bbaibbele. Pele eco Nce kanana nca Muuya Uusalala, luyando lwa Leza.

⁸³ Mwaalumi mukubusyi wakali kwaambaula kuli ndime buzuba bumwi. Banyina, mwanakzi mubotu. Nda kamuziba

mwanakazi, kamuswaana ciindi comwe na zyobilo. Elyo waa kati, “Oh, oyandwa,” ku mulombe wakwe, “boola okuno, Ndi yanda kuti ulange. Ndi jisi mafuta mu janza lyangu.” Ee, Ndi jisi, ambebo. Mpe mpawo Mpeli kuzwida nkasaalo. Lino, kati, “Ndi jisi mafuta mu janza lyangu.” Kati, “Ino ciyeeyela nzi eco?”

⁸⁴ Mpawo mulombe wakalanga kuli banyina, a kuti, “Baama, Ndi yanda ku mubuzya cintucimwi.” Waa kali kuyanda kuti akombe, yanda kuti a kombe kutegwa kaba akweenda kwa munsu loko kuli Leza. Wa kati, “Cindi mafuta nakasika mu janza lyanu, sa akakugwisya koonse kupegwa mulandu wanu? Sena akamupa luzibo lubotu kuli Leza, cindi mafuta . . .”

“Peepe.”

Kati, “Mpawo inga Nda asiya buyo alikke.” Nce ncico.

⁸⁵ Oh, inyika, inyika ya bukombi, bantu ba pentekoste, balangila zibotu loko zikwelelezya. I inyika, bayiide (bategwa) inyika, inyika yatubungwe, balangila bwiinguzi bumwi bupati kutegwa bakonzya kubelesya kulondola kabungwe kabo a kujana mamembala manji muli nkako, “bali milioni bambi,” nywebo mulizi.

⁸⁶ A i-i masi alangila musyobo umwi wa mpi ya basilikali ikonzya kuleta inyika yoonse ku mazwi abo, a kuleta bululami.

⁸⁷ Mukwesu, tabusiki kwiinda ku kwelelezya kubotu kwa pentekoste. Naanka kuti busika kwiinda ku tubunga twa Protestanti na kwiinda ku kabunga kazyuuno kana Katolika. Naanka kuti busika kwiinda kuma pentangoni, na kujula mapeegi mapya. Ku boola kwiinda ku buumi bulipede kuli Jesu Kristo, kwiinda mu lubapatizyo lwa Muuya Uusalala. Kufumbwa cintu citasiki kuli ceeco, cili lubide.

Atu kombe.

⁸⁸ Ndila lomba mucizi wesu kuboola ku organi okuya, piyaano, ku ciindi eci. Kuciindi notuli mu mipailo, kuciindi muntu aumwi na kotamikide mitwe wakwe, a muntu aumwi mu mupailo. Nda libuzya, ku ciindi eci, ikuti na inga wasoleka muuya wako ku Ijwi lya Leza. Sa uli luleme?

⁸⁹ Kwamana kuswaangana oku, mbuli Mbwe mwaambila, Ndi jisi bamamazya balede okuya, ku ciimo cakufwa, Nde elede kuyo babona, bali mukufwa. Beenzuma bamwi, abo Mbe zyi ano, abo Mbe swaya, abo balede ku ciimo cakufwa, bantu baka kkala mu cikombelo eci. Oh, mukwesu, mucizi, ula boola anselelo awo, ayebo. We elede kuselemukila awo.

⁹⁰ Lino, yebo wati, “Ee, Ndi—Ndi lizi obo, Mukwesu Branham. Ndi kanza kubamba cintu eco, bumwi bwa mazuba aya.” Pele inga tii kwaba “bumwi bwa mazuba aya,” kuli nduwe. Obu inga bwaba mbo buzuba bulikke.

⁹¹ Nkusyoonto buti oyo muntu nkwa kazyi, kasika ku California, kuya ku Michigan, buzuba bumwi, antomwe a

mukaintu wakwe muniini kutala okuno, keenzya i—i mootokala; walo mu piki uupu, kabaya ku muunzi wabo mupya. Wa kazwaa kuleka ncito mu Mpi yamu maanzi. Nkuniini kwakazi kabotu cindi na katalika cifumo eco, ndiza kuzwa ku poorti lya basikweebela zilengwaleza, kuti mukaintu wakwe a muvwanda bakali nooba mitunta mu maminiti masyoonto? Pele, atalatala buyo lya Henryville okuya, mootokala wabo waka umputana a bbasi. Alimwi namutekenya wakapanga i—i. . .mota yakwe yakayutuka mbuli cifulo camunkomo, kutandila, pele wakajaya mwankazi a musimbi muniini. Ndi syoma kuti buntu bwabo bwakali luleme kuli Leza.

⁹² Ii mvwiki zisyoonto zyainda, cindi Mukwesu Wood a Ndimbe ni twa kaunka atala awa ku ndeke eyo yakawa kusule lya busena awa, akuba langilila kabakwela tubeela twa mibili ya bantu bakali eiti, kwalo mitwe a maulu amaboko akali mbwelengene aa busena. Kubwezelela mibili, a zyamukati kaziloka kuzwa ku mubili ya muntu; muntu mubotu, antela, muntu wampuwo uuzwa ku Chicago. Cindi oyo muntu nakanjila mu ndeke cifumo eco, Nda libuzya busiku na wakaunka ku cikombelo, ikuti na wa kajisi makanze mabotu. Sena mweembeli wakapa lwiito lwaku cipaililo? Sena wa kacitapatila cibi, nkabela muntu wakali jisi coolwe? Na sa wakeenda kali munyama? Sa wakali muntu, ku meso aa Leza, mwana wa Leza?

⁹³ Amu ziyeeye zintu ezyo, nobeenzuma. Zyalo nziyandisi. Tazili ziyandisi biyo, zyalo nziyandika kapati kuli ndinywe ku ciindi ecino. Eci nce ciindi noya kubamba muzeezo wako. Eci nce ciindi noya kubamba muzeezo wako wa buumi obu, wa buumi kuzwida awo. Akube kuti uicite kuciindi notu komba.

⁹⁴ Taata Wakujulu, mbuli mbo tubala mu Bbaibbele kuli ceeco Nco kaamba kujatikizya cibi, a baabo bacicita a kuta lyaambilila. Tula mvwisya eco nco caamba kufwa kakutakwe kuziba Leza. Tu lizi obo ku luzibo lwa bamwi, abo mbo twa kabona kuunka. Abo ka kanzide, abo kacisaya kwa ciindi cilamfu. Leza, abo bakalibanda a kutaba aceeco ncoba kaamba kuti bakali jisi. Abo bakali kulilemeka mbuli Banakristo, elyo nekubaboobo taakwe nibakali Banakristo. Buumi bwabo bwaka citondezya, a lufu lwabo lwaka citondezya.

⁹⁵ Lino, Taata, Nda komba kuti Uka nane ku moyo aumwi awa sunumasiku. A lwangu, Mwami, mukuba sikumuka kucita, nkambo nzintu zinji nzi Nda keelede kucita nkabela teenda kazicita, Nda lyaambilila bulubizi bwangu. Nda bwaamba bulubizi bwa bantu aba. Nda bwaamba bulubizi bwa cisi eci. Nda Ku lombwa kuti ufwide luse, Mwami. Ndi jisi bana botatwe baniini okuya baku komezya. Alimwi tu pona ano aa kasena kapyia, alimwi, Leza, ta kuyandikani kuzuza. Uli zyi koonse kujatikizya nkuko. Leza, Ndi yanda kululama kuli Nduwe.

⁹⁶ Buzubabumwi, ikuti na bbomba lya atomiki talika tujani,

ntenda iyo cita. Ikuti na ntenda taika tujani, bulwazi bumwi buya kucita. Cintucimwi ceelede kututola. Pele tuli kkomene loko kuziba kuti kuli nzila ya kulobokela. “I Zina Iya Mwami ni—ni ngazi, elyo balulami bazuzila mukati omuya nkabela bali kwabilidwe.” Leza, akube kuti mweenzuma sizibi, sunumasiku, mulombe, musimbi, mwaalumi na mwanakazi, abone mulyango ujukide, ciindi ceelede, a kuzuzila kuli Kristo oora eli.

⁹⁷ Lino kuciindi notu kotamikide mitwe yesu, sa kuli bamwi awa, na, Ndi lizi kuli bamwi awa bayanda kwaamba kuti, a janza litambikidwe kuli Leza, “Nda usansoni ku buumi bwangu. Elyo Ndi—Ndi yanda kulyaambilila bulubizi bwangu kumbele Iya Leza, a kulomba luse.” Tambika janza lyako kuli Leza. Leza aku longezye. Leza aku longezye. Leza aku longezye. Kuli banji banu, banji banu. Inzya. Kuli banji banu awa, abalo, kuti... Leza amu longezye.

⁹⁸ Bunji bwanu okuno, abo bakalibanda Bunakristo kwa ciindi cilamfu, a kuziba kuti waka kakilwa kweendelana abweende bwa Leza, uziba kuti ucita zintu ndyoonya lino nzo taelede kucita. Alimwi uleenda, kazi taambidwe, cakwiibuka buyo bulileke kubweende bwa mayuwe. Kulanga ku musyobo wa mabambe ngo teeleda kulanga. Ikulanga ku musyobo wama magazini a kubala bulembo obo mbo teeleda kubala. Ta ceeleli ku Banakristo. Kuswiilila ku kudana kubyaabi—kubyaabi a tombe akunombene nko teeleda kucita; nyoonse nobaalumi a banakazi. Mulaazi masena oko nko mwakali kukonzya ku kanana nkabel tee mwaka kucita, nkabela mula mulandu, ndizi, cibi cakujatilwa.

⁹⁹ Nda libuzya ikuti na inga watambika janza lyako kuli Kristo, kuba a luse kuli nduwe, aku kujatila. Tambika janza lyako. Leza aku longezye, omulindu mukubusyi; mbuli mwanakazi mbwa eenda kuzwa, kuboola ku cipaililo, kuti alyaambe zyakwe. Tambika janza lyako kuli Leza. Leza aku longezye. Mbo kuyandika, omudaala. Mbo kuyandika. Leza aku longezye. Tambika janza lyako. Uli zyi kuti waka lubizya.

¹⁰⁰ Nda libuzya ikuti na ujisi camba, sunumasiku, caku ndiswaana awa aa cipaililo. Atu fugame awa a kwaamba kuti, “Leza, koba siluse kuli ndiswe toonse. Tula Ku yansya.” Leza aku longezye, omulindu.

¹⁰¹ Kubona aba banakazi bakubusyi kaba boola, kabalilila, buumi kumbele lyabo! Bali aciindi ciyandikana kapatu. Mba sikusaalwa ba ziimo. Inzi? Sena mula mvwisya, nobantu bakaindi, cindi ni twakali balombe, balombe besu bajisi ziindi zili kkumi zya masunko aayo ngo twa kajisi? Mucizi, sena ula mvwisya kuti mwana wako musimbi ujisi ziindi zili kkumi zya masunko ngo kajisi cindi nokali musimbi? Ino mwana wakwe musimbi uyooba aanzi? Amulange zintu, zifwanikiso dyabulosi nzyali mukupenta.

¹⁰² Oh, obo mbo tu yandikana ku komba! Lino tuyo jokela kuli ndinywe alubo. Mukwesu, sena ula mvwisya kuti ta tukokomba cisela mbuli bamatata besu mbo bakacita? Omweembeli, sena ulizi kuti ta tu bikki ciindi cinji ku mazwi esu mbuli beembeli besu mbo bakacita kale? Nobanakazi, sena mula mvwisya kuti tamu balailili bana banu basimbi, a kukomba a mbabo masiku, mbuli banyoko mbo bakali kucita? Mpawo, ino kujatikizya ncico, nguni ujisi mulandu? Tu jisi mulandu. Takukwe nzila ya kuceenguluka. Tu jisi mulandu.

¹⁰³ Ndi jisi mulandu. Ndi jisi mulandu waku tacita mulimo wa Leza, mbuli mbo Nde elede kucita. Nda caamba, kuti Ndili lubide. Ndi lombamba Leza kuti abe siluse kuli ndime. Nda langa awa a kubona ziimo zyeede Nze kaimpya, nkaambo ka zintu zitakweankoziza, zintu ziniini zikulukulu ezyo zyatakali kwaamba cintu. Nda usa kuli lwangu, mbuli mukutausi wa Makanimabotu kumbele lyanu. Nde empwa kumbele lya Leza, a kulomba Leza kuti andijatile, a mbungano yaku ndijatile, nkambo ka kumuka maningi kujatikizya mulimo wa Leza. Ku luzyalo lwa Leza, a ku lugwasyo lwa Leza, Nse—Nse kaciswiilili eco. . . Muntu onse kasola ku mwaambila cintucimwi cakucita. Ba jisi bubambe. Ba jisi cintucimwi cakuti ucite. Bufuba. Ndili aazi mabambe aa Leza; ali lembedwe omu mu Bbaibbele. Alimwi Nda usa nsoni kuli lwangu mbuli mukutausi wa Makanimabotu. Bantu bali milioni yomwe bakawinwa, Nda keelede kuba a bantu bali mamilioni ali kkumi bakawinwa; Ndili kule loko.

¹⁰⁴ Ino kujatikizya nduwe? Mbangaye bantu mbo kawina kuzwa nokaba muli Kristo? Bunakristo buzwa kuli umwi kuya kuli umbi. Mbangaye bantu mbo kawina kuzwa nokaba Munakristo? Ikuti na toli mu kuwina bantu, ujisi mulandu, uli musundi, wa leta mause ku Mbungano a Makanimabotu. Mbangaye bantu mbo katola ku muswaangano wa mipailo Bwatatu masiku? Ikuti na to ciciti, weelede kuusa nsoni lwako kumbele lya Kristo. Ujisi mulandu, alimwi busena bwako buli a cipaililo. Nda mutamba kuboola kubaa ndime, ku kweempwa.

¹⁰⁵ Mpawo mu kotamike mitwe yanu, akwiibamba kiikoteme asyoonto, kucindi Ne limvwa mulandu wangu akuyanda kweempwa. Kukotamika buyo mutwe wako.

¹⁰⁶ Taata wesu Wakujulu, Nda kotamika aa cipaililo eci a kulomba kujatilwa kwa zibi zyangu. Nda lombamba kulekelelwa kwa zibi zya baabo bali ku cipaililo. Nda lombamba kulekelelwa kwa mbungano eyi, ku mubili—ku mubili wa basyomi cisi a masi oonse. Nda lombamba luse, mukuba mulenga maningi kujatikizya zintu zya Bwami. Nda lombamba kuti Uyo tujatile zibi zyesu, a kugusya nsotoko zyesu—zyesu—zyesu. Elyo kotu jatila mukuba bafuba loko, ku bufuba bwa bantu. Obo mbo twa kalela! Obo mbo twa kabweza kubelesya kwa mubili! Obo mbo twa kacita zintu nzo twa takeelede kucita! Obo mbo twa kabisya kumbele Lyako!

¹⁰⁷ Lino ku muswaangana oyu wa Munsondo masiku, Taata, mukubona musinsimi wakali wansoninsoni mu Bbaibbele, twafwa nsoninsoni sunumasiku. Nda usa kumbele Lyako, nkaambo ka zibi zya bantu. I bantu, cisi cangu, bantu bangu, Nda fwabweeme kuli mbabo, Mwami. Kubona balindu besu bakubusyi kabeenda mu tugwagwa a kulilemeka mbuli mbo babede! Kubona bwaamu, baalumi bakubusyi kabapona mu—mu misyobo yoonse ya buumi! Kuba bona kaba kkala ku ng'anda kuzwa ku mbungano, a kubala ma magazini akaindi nge bata keelede kubala! Kulanga mabambe ata bambulwidwe! Kuswiilila kudana kubbi kwa Hollywood! kuswiilila ku ciimbo ca dyabulosi citegwa bbuugie-wuugie cakaindi, oko kukonkolwa kuzwa ku bantu abo ba mpuwo mbi a bajisi manjezeezya mabi, koongelezya kwa dyabulosi, ku nanika milimo ya dyabulosi ali!

¹⁰⁸ O Leza, Nda usa nsoni kuli lwangu kuta tapatila munzila Nje elede. O Leza, kogwisya mulandu wangu. Nda Ku lombakuti ucicite. Nda Ku lombakuti ujatila bantu aba bali waano, lutaanzi, toonse swebo. Kotu gwasya kubuka kuzwa ku cipaililo eci mbuli baalumi a banakazi bapya. Kotu gwasya kuzwa awa mbuli Banakristo mbo beelede kuunka.

¹⁰⁹ Kotu gwasya “Kubikka ambali zitucelezya zyoonse, a cibi eco citu nyonganya cabuteteete, kutegwa tu zuze muzundano a lukakatilo oyo uubikkidwe kumbele lyesu.” Kutali kulanga ku televizhioni, kutali kulanga kuli basikusangallisya kudana iba inyika, pele, “Kulanga kuli Mukamwini a Sikulomya wa lusyomo lwesu, Mwami Jesu Kristo, Oyo waka sampaula mause aa ciingano a kuciyumuna nkambo ka ndiswe, a kupenga kakutakwe mulyango, kutegwa Asalazye bantu ku Bulowa Bwakwe.”

¹¹⁰ Kotu salazya kuzwa ku bubi boonse, a kutu bweza mbuli bana Bako beni, sunumasiku, a kutu tambula mu mupailo oyu wa kweempwa. Elyo kotupa, Mwami, luumuno a lutangalo. Elyo akube kuti bulo boonse, sunumasiku, mbuli mbo tulala, kuyeeya muswaangano wa busiku obu, akube kuti tuyeeye ziimo zya inyika, ezyo Bbaibbele nzolya yubununa kuli ndiswe lino. Akube kuti swebo, mbuli mbo tu ciyeeya, masyu esu akauminwa mause, alimwi akube kuti Ulete luumuno a lukkomano ku moyo aumwi. Twe empwa, Mwami, kumbele Lyako, aa cipaililo eci.

¹¹¹ Leza, kondi gwasya mbuli Mbwe pasuka lino, ku lusyomo, a kukomba kuti cili mu luyando Lwako, kutegwa myaanda minji, minji, ya bantu ikawinilwe kuli Nduwe. Elyo kondi gwasya kuba a lusyomo a cambia, mbuli Mbwe zumanana kweenda; kutali kulanga kuli umwi pele kuli Nduwe, Mukamwini a Sikulomya wa lusyomo lwesu. Leza, ko cipa.

¹¹² Kojatila daikona oonse wa mbungano eyi. Kojatila mweembeli. Kojatila mamembala buyo, Mwami. Kojatila bantu boonse, zibi zyesu zyoonse. Kotu jatila, Mwami. Kojatila

beenzu boonse mu mulyango wesu. Elyo akube kuti tumvwe koongelezya kwa Muuya Uusalala ku buumi bwesu, nkaambo tuli bombede kumbele Lyako, sunumasiku, kweempwa a moyo wesu oonse, kuti Uyo tu tambula a ku tubamba kuba babombe, batontozi, basalazigwa, babombe ku mulimo Wako. Kopa cilongezyo eci, Mwami, ku cipaililo mpo tubede. Ko cipa. A kukotamika mitwe yesu a myoyo kumbele Lyako. Mu Zina Iya Mwana Wako, Mwami Jesu, twa lombwa eci. Ameni, a ameni.

Ndili Wako, O Mwami, Nda mvwa Jwi Lyako,
Alimwi Wa kaambila luyando Lwako kuli
ndime;

Obo Mbwe yandisya kubuka mu maboko aa
lusyomo,
A kukwelelwa muni loko kuli Nduwe.

Kondi swenya muni loko, muni loko, Mwami
ulelekedwe,

Ku ciingano awo Mpo kafwida;

Kondi swenya muni maningi, muni maningi,
muni maningi, Mwami ulelekedwe,

Ku bbazu Lyako liyandisi, lizwa malowa.

¹¹³ Ambali Iya cipaililo, sunumasiku, akati ka bakwesu bali atala awa aa cipaililo, Ndili kkomene kubona, sunumasiku, kutandila bamaalumi baliko mbubonya mbuli banakazi. Kanji, balo mbanakazi bakozya kulila cabuteteete. Myoyo yabo, kuli cintucimwi kujatikizya mbabo, cikonzya kugumwa cabuteteete nkaambo ka bwanakazi. Elyo balo—balo mbalindu, alimwi mula konzya ziindizimwi kuba guma. Pele Ndili kkomene kapati kubona Muuya Uusalala ulakonzya kuguma bantu, abalo, a kubaleta ku cipaililo.

¹¹⁴ Elyo Nda libuzya na mbangaye banu ku cipaililo, abo bakafugama lino, abo balimvwa kuti mwabamba kulisalazya kuli Leza, kuti muya kuzwa okuno sunumasiku, kupona buumi bubotu loko, ku luzyalo Iwa Leza, a kucita kunji ku Bwami bwa Leza, a ku kaambo Kakwe, sa inga watambika janza lyako kuli Kristo, ikuti na nkoli ku cipaililo, kwaamba, “Nda syoma eco eno Nda empwa”? Akube kuti Leza aku longezye.

¹¹⁵ Mbangaye banu kusule okuya balimvwa kuti beempwa mu zyuuno zyanu; limvwa mbuli kuti uyanda kucita kabotu maningi? Leza aku longezye.

Lino atwiimikile.

¹¹⁶ Uli waano aa cipaililo, kolangide munzila *eyo*, ikuti na ula konzya. Lino, yebo awa aa cipaililo, atambika maanza ako okuya, kuti uyanda mupailo wabo, kutegwa uzumanane. Sa inga watambika maanza ako kuli bali mu bbunga? Ncibotu. Lino tambika maanza ako kusule awa, ku cipaililo awa, kuti uyanda mupailo wabo, ayebo. Kutu tuyo... Leza utu gwasya kucita. Akube kuti Mwami Jesu atu longezye.

Lino, muta lubi kuswaangana kwa masiku Munsondo.

¹¹⁷ Sena ujisi mawi akwaamba, Mukwesu Neville? [Mukwesu Neville wakanana ku Mukwesu Branham—Mul.] Busiku Bwabili a Bwatatu...Uli kuli oyo mulimo wa missioni? [Mukwesu Neville waingula.] 1628 West Market, obu busiku Bwabili a Bwatatu bubsika.

¹¹⁸ Elyo mpawo mu Mujibelo a Munsondo, Ndi nooli ku Madisonville, Kentucky, ku auditoriamu okuya. Elyo mpawo tu zumanana kutanta kuya mu New York.

¹¹⁹ Lino, kaambo nco twa kotoka kufwambaana, Ndi jisi bamamazyala abo bacisidwe, loko loko, balo bali mu kundiitila. Lino atu... .

¹²⁰ Ujisi majwi akwaamba na, Mukwesu Neville? [Mukwesu Neville waamba, “Peepe.”—Mul.] Taakwe.

¹²¹ Atu kotamike mitwe yesu aniini buyo, kuciindi notu komba. Yaa. Bucebuce lino:

Leza abe a ndinywe mane tuka swaangane
alimwi!
Ku... 

56-1125^E Musinsimi Wansoninsoni
Branham Tabernacle
Jeffersonville, Indiana U.S.A.

CHITONGA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitaminidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyobolwa mu ciyanza cakujokolosya, kusandululwa mu misyobo iimbi, na kubeleseghwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org